

der das Wasser auff oder ab/mit dem Hund suchen gehen/allda er auch zu finden ist. Denn er seindem Geäß nach/wol ein gute viertheil Meil wegs lang zu lauffen im brauch hat/vñ trägt sich doch lieber gegen/denn ab dem Wasser/defß Winds wegen/so ihm den Fischruch in die Nasen schlägt. Auch dieser vrsachen halben auß seinem Läger gegen dem Wasser auff seinem Geäß nach schleichet/damit er nachmals/wenn er gnugsam vnd wol satt worden/seinem vorigen ersten Läger/widerumb zu rück dem Wasser ab/zu kehren möge. Er bleibt aber nicht lang in einem Läger/darumb daß die Wende vmbher fast abgewendet/gehet also/suchet ein ander new Läger/auch eine andere frische Fischwende.

Wenn der Otter Jäger aber dem Otter oder Biber verbrechen vnd bestättigen wil/so sol er den Otter oder Biber suchen an dem Ort/da er in lezlich gespüret vnd gelassen hat/vnd allenthamben am Vser/das Wasser auff vnd ab fleissig suchen/ob er etwan sein Läger außspüren vnd finden möge.

Wenn der Jäger das Wasser auff vnd ab alle ort dermassen außgangen/vnd befindet/dass er noch im Verbruch/vnd weder höher auff/noch tieffer dem Wasser abkommen sey/oder sonst sich anderswo verlossen vnd versteckt habe/sondern etwa in einer Klufft/oder Hölen/oder aber vnter einem holen Baum verborgen ligt/so kanstu jm als denn verbrechen/vnd solches deinen Mitsgesellen/dir zu helffen/auch ankünden.

Wenn die andern Mitgesellen von ihrer Such kommen seyn/sollen sie ein wenig Fröstlecken/vnd ihren Otter oder Biber Hunden/auch etwan Brot oder was anders zu essen fürwerffen/vnd als denn samptlich defß Ottern Gruben oder Läger zunahen/vnd etliche auff einer/etliche auff der andern seiten defß Wassers/dass er ihnen nicht entgehe/gute hut vnd achtung haben sollen. Es sol auch ein jeder einen gekrümpften Stecken/oder ein krumme Gabel in seiner Hand haben/vnd so man nicht ferrne von defß Ottern Läger oder Gruben/da jm verbrochen worden/seyn wirt/sol man die Hunde lösen vnd sie lauffen lassen.

Wenn die Hunde denn hin vnd her ihn suchen/lauffen/vnd fast lauten/vnd mit den Füßten scharren vnd krazen/vnd sich sonst fast frewdig vnd mutig vernemen vnd sehen lassen/so ist es ein zeichen/dass sie den Otter gefunden vnd auffgejagt haben.

Wenn aber denn auch der Otter/vnd ihm nach die Hunde/sich ins Wasser begeben würden/sollen die Otter Jäger auff beyden seiten defß Wassers auff vnd ab fleissig achtung haben/ob sie den Otter mit ihren krummen Stangen oder Gabeln erschlagen mögen/oder auch/wenn die Hunde ihm so fast auff der Haß nachjagen/vnd er sich vnter das Wasser verbergen wolte/sonst an allen orten gute auffschung haben/wo er sich verborgen/vnd etwan sich widerumb herausser vñ herfür thun/wo hin er sich auch auff's Land in eine Höle oder holen Baum/auch vielleicht in dickes Gras oder klein Gestreupig/widerumb auff ein newes verschlagen vnd verbergen würde.

Wenn die Hunde denn den Otter das Wasser auff vnd ab also suchen/auch deren eins theils sich in das Wasser werffen/ihm nachjagen/vn fast laut seyn/so auch der ander theil von Hunden hinzu kommet/vnd dem Otter zu gleich auff dem Halfe seyn/wirstu als den ein schöne lustige Otter Jagt oder Beyß zu sehen haben. Doch die Otter Jäger auff das Wasser so wol auff vnd ab ein fleissiges Aug haben/vnd sehen/wo sich etwan der Otter herfür lassen wolte/auch wo er sich herfür thete/mit iren Gabeln in zu erschlagen/wol gefast vnd gerüst seyn sollen. So er denn endelich von einem erschen vnd erschlagen wirt/sol er ihn gegen dem Wasser von der Erden in die höhe heben/vnd die Hunde rings vmb ihn her wol lauten lassen/vnd darnach ihn also todt mitten vnter die Hunde werffen/sie vmb vnd ober ihn her lauffen vnd springen/sie auch lezlich mit Brot/Käß/vnd gekochtem Fleisch dabey wol/wie bräuchlich/pfneisten lassen. Vnd ist also der Otter oder Biber auff diese weis/nemlich mit gewalt vnd hülff der Otter vnd Biberhunden/in vnd bey den kleinen Wassern oder Flüssen zu jagen vnd fahen.

Man kan aber den Otter auff ein andere Manier vnd Weise fahen: Erstlich sol man ihn auffsuchen/vnd verbrechen/vnd die Hunde am Wasser die länge auff vnd ab suchen vnd lauffen lassen/die Jäger auch zu beyden seiten defß Wassers/auff den Otter vnd Hunde gut achtung haben sollen. Vnd wenn auch die Hunde bey Nacht den Otter suchen/vnd sein still in der such verfahren vnd sich halten würden/ist es ein anzeigung sehr guter Otter Hunde. Wenn sie aber dem Otter wegen der breite vñ größe defß Wassers/nicht finden würden/sollen die Otter Jäger Netz nemen/dieselbigen so weit als sie vermeinen/dass sich der Otter halte/die länge defß Wassers auff vnd ab/zu beyden seiten rührend/einwerffen vnd auffrichten.

Die Netze sollen fornen am einsatz sein weit seyn/damit man beyde seiten defß Wassers oder Flusses wol beschliessen möge/vnd das vnterste Zugseil/so auff den Boden rührt/sol mit Bleyklobern vmbhenckt seyn/das oberste aber nicht/vnd sol das Netz allgemach je enger zusammen gehen/vnd zu vnterst am Züpfel defß Netzes sol auch ein Zugseil seyn/welches einer auß den Otter Jägern